

Kalaallit Nunaanni Inatsisartunut qinersisarneq pillugu Inatsisartut inatsisaata allanngortinneqarnissaa pillugu Naalakkersuisut UPA 2017-imut suliniuteqaqqullugit Inatsisartut aalajangiiffigisassaattut siunnersuut, taamaaliornikkut inatsisartunut qinersinisaq tulleeq nallertinnagu Avannersuup, Ittoqqortoormiillu immikkut inatsisartunut qinersiveqalernissaat qulakkeersinnaaqqullugu.

(Inatsisartunut Ilaasorta: Anthon Frederiksen, Partii Naleraq)

Akissuteqaat

(Naalakkersuisut Siulittaasuat)

Aappassaaneerneqarnera

Aallaqqaatigalugu Inatsisinut Ataatsimiititaliap aalajangiiffigisassatut siunnersuummut isumaliutissiissutaanut Naalakkersuisunit qujavugut.

Siullertut Naalakkersuisut erseqqissaatigissavaat Nunamut Namminermut Immikkoortortaqarfik inatsisilerituumik ataatsimik atorfeqartitsiuarfikuummat, Nunamut Namminermut Immikkoortortaqarfimmili suliassaqaangaatsiarneq pissutigalugu pisarnertut avataaneersumik siunnersortimik ikiorteqartariaqarneq pisariaqarsinnaasarmat.

Ilutigitillugu Naalakkersuisut Inatsisartunut ilisimatitsissutigissavaat kommunini qinersisarneq pillugu inatsisissatut siunnersuut nutaaq ukjaru ataatsimiinnermi saqqummiunneqassamat. Inatsisissatut siunnersuutip juunip qaammataani tusarniutigineqarnissaa naatsorsuutigineqarpoq.

Naalakkersuisut maluginiarpaat Inatsisinut Ataatsimiititaliap Naalakkersuisut kaammattormagit isumaliutigeqqullugu Inatsisartunut qinersinermi maleruagassat atuuttut sukumiinerusumik nalilersuiffigineqassannginnersut tassunga ilanngullugit qinersinnaatitaasut taasinerminnut atatillugu kinaassutsimut uppenarsaammik takutitsisinnaanerata, ataatsimiititaliarlu allannguutissatut siunnersuuteqartoq taasissutigineqartussamik:

”Qinersiviup ataasiinnaanerata attatiinnarneqarneratigut qinerseriaatsip atuuttup iluaqtissartai ajoqtissartaalu pillugit Naalakkersuisut UPA2017-ip naannginnerani nassuiaammik suliaqaqqullugit peqquneqarnissaannik Inatsisartut aalajangiiffigisassaattut siunnersuut.”

Inatsisinut Ataatsimiititaliap oqaaseqaataa allannguutissatullu siunnersuutaa Naalakkersuisunit isumaqatigineqarpoq apeqqutillu uuma Inatsisartunit nangittumik suliarineqarnissaa qilanaaralugu.